



Pou Piblikasyon Imedya: 16/08/2021

GOUVÈNÈ ANDREW M. CUOMO

GOUVÈNÈ CUOMO ANONSE YON LÒD KI EGZIJE VAKSINASYON KONT COVID-19 POU TRAVAYÈ KI NAN SEKTÈ SWEN SANTE YO

Depatman Sante a Soti Òdonans selon Atik 16 la pou Lopital ak Etablisman ki bay Swen Alontèm yo pou Etabli yon Politik ki Garanti ke Tout Anplwaye yo Vaksinen

Premye Dòz la Obligatwa pa pita pase 27 Septanm

Depatman Sante a Otorize yon Twazyèm Dòz pou Nouyòkè ki gen Sistèm Iminité ki Afebli yo

Jodi a, Gouvènè Andrew M. Cuomo te anonse ke tout travayè nan sektè swen sante nan Eta New York, ki enkli pèsonèl ki nan lopital ak nan etablisman ki bay swen alontèm yo (LTCF), ki gen ladan yo, mezon retrèt yo, sant swen pou adilt, ak lòt etablisman swen kolektif yo, ap gen obligasyon pou yo vaksinen kont COVID-19 pa pita pase lendi 27 septanm. Depatman Sante Eta a pral soti Òdonans selon Atik 16 la ki pral egzije tout lopital, tout Etablisman ki bay Swen Alontèm (LTCF), ak tout mezon retrèt yo pou yo devlope epi enplemant yon politik ki egzije pou anplwaye yo vaksinen, ak kèk ti eksepsyon limite pou moun ki gen rezon medikal oswa relijye yo. Jiska jodi a, 75% nan anplwaye lopital nan eta a ~450,000, 74% nan anplwaye etablisman ki bay swen pou adilt nan eta a ~30,000, ak 68% nan anplwaye mezon retrèt nan eta a ~145,500 fin pran seri vaksen yo te dwe pran yo. Administrasyon gouvènè Adjwen Kathy Hochul la te enfòme de sa anvan anons lan te fèt.

"Lè COVID te kenbe New York ann otaj ane pase, Nouyòkè yo te aji, pandan ke Gouvènman Federal la te nye pwoblèm nan," **dapre sa Gouvènè Cuomo te deklare.** "Kounye a, varyant Delta a ap gaye kò l nan tout nasyon an ak nan tout New York -- nouvo ka pozitif kotidyen an ogmante depase 1000% pandan sis dènye semèn ki sot pase yo, e plis pase 80 pouzan ka pozitif ki resan yo nan Eta New York la lye ak varyant Delta a. Nou dwe aji kounye a pou nou kwape pwopagasyon an. Ewo nan sektè swen sante nou yo te mennen batay la kont viris la, e kounye a nou bezwen yo pou nou mennen batay la ant varyant lan ak vaksen an. Nou te toujou suiv lasyans, e nou kontinye ap fè sa jodi a ankò, ansanm ak rekòmandasyon sa yo ke Dr. Zucker ak ekspè nan sante onivo federal ak lokal yo te bay. Men nou dwe fè plis. Mwen ankouraje antrepriz prive yo pou yo aplike politik admisyon pou sèlman moun ki vaksinen yo, epi pou distri lekòl yo egzije vaksinasyon pou pwofesè yo. Ni youn ni lòt nan mezi sa yo p ap pran si leta pa egzije sa legalman -- antrepriz prive yo p ap aplike

yon obligasyon vaksinasyon amwenske se lalwa ki mande I, e distri lekòl lokal yo ap ezite anvan yo pran desizyon difisil sa yo si pa gen direktiv legal."

Gouvènè Cuomo te anonse tou ke Depatman Sante a te otorize yon twazyèm dòz vaksen kont COVID-19 pou Nouyòkè ki gen sistèm iminitè ki afebli yo, selon rekòmandasyon semèn pase Sant Kontwòl ak Prevansyon Maladi (CDC) yo. Nouyòkè ki elijib yo ka resevwa twazyèm dòz yo a 28 jou apre yo fin pran seri vaksen de dòz yo a, efektif imedyatman.

Aktyèlman CDC a rekòmande pou moun ki iminodefisyans a yon nivo modere jiska yon nivo grav resevwa yon dòz adisyonèl, sa enkli moun ki:

- Resevwa tretman kansè aktif pou timè oswa kansè nan san;
- Resevwa yon grèf ògàn e k ap pran medikaman pou siprime sistèm iminitè a;
- Resevwa grèf selil souch nan lespas 2 lane ki sot pase yo oswa k ap pran medikaman pou siprime sistèm iminitè a;
- Gen yon iminodefisyans modere oswa grav (tankou sendwòm DiGeorge, sendwòm Wiskott-Aldrich);
- Gen enfeskyon VIH ki avanse oswa ki pa trete;
- Gen yon tretman aktif ak gwo dòz kòtikostewoyid, chimyoterapi kont kansè ki koze iminosipresyon ki grav, oswa lòt medikaman ki ka siprime repons iminitè w.

Nouyòkè yo dwe kontakte pwofesyonèl swen sante yo konsènan si resevwa yon dòz adisyonèl apwopriye pou yo nan moman sa a.

Komisè Depatman Sante Eta New York Ia, Dr. Howard Zucker te deklare, "Pandan ke nou fè pwogrè ekstrawòdinè nan vaksinen Nouyòkè yo, nou lwen fini ak pandemi sa a e nou dwe fè plis ke sa. Done ak lasyans di nou ke lè gen plis moun ki vaksinen pi vit ke posib se meyè mwayen pou kenbe moun yo sennesof, pou anpeche nouveau mitasyon, e pou pèmèt nou retounen nan woutin kotidyen nou yo. Lòd sa a pral ede ni nan konble eka vaksinasyon an ni nan redwi pwopagasyon varyant Delta a. Mwen vle remèsye tout anplwaye sektè swen sante nan Eta New York poutèt yo te angaje yo ankò e montre eta nou an ke resevwa vaksen an sennesof, fasil, e sa ki pi enpòtan, efikas."

Etap sa yo suiv anons 2 out Gouvènè Cuomo a ki mande ke anplwaye MTA ak Otorite Pòtyè k ap travay nan etablisman nan New York yo pral gen obligasyon pou vaksinen kont COVID-19 pa pita pase Jou Travay (Labor Day), e anons 28 jiyè li a ki di ke anplwaye ak anplwaye k ap kontre ak pasyan fas pou fas nan lopital publik yo ap oblige vaksinen kont COVID-19 pa pita pase Labor Day. Anplwaye leta ki chwazi rete san vaksinen ap oblige sibi tès COVID chak semèn.

###